

ادبیات غمرویه مجری

هفته‌لق سیاسی ، ادبی ، علمی غزته‌در

جلد : ۵

سنه : ۳ ۱۷ ربیع الاول ۱۳۳۷ جمعه ابرینی ۲۱ کانون اول ۱۹۱۸ نوسو — ۹۹

مطبوعات قانونی و جرائم مطبوعات

تبع

[۹۷ و ۹۸ نوسو لی نسخه لر مندن ماده]

مطبوعات قانوننك ۲۵ نجی ماده سنده ذم و قدح شو وجهله تعریف ای دیلیور :
« پر ذات یا خود بر هیئتك ماده مخصوصه بیانله اخلاص ناموسنی یا کسر
اعتبارنی موجب عز و یاته [ذم] ، و ماده مخصوصه بیان اولنق سزین وقوع
بولان بو قیل عز و یاته ایسه [قدح] اطلاق اولنور .
بو تعریفه کوده ، تعیین ماده صورتیه اخلاص ناموسی موجب وقوع بولان عز و یات ،
[ذم] ، و ماده تعیین ای دیلیرك واقع اولان اسنادات [قدح] در .
بو ماده [ذم] و [قدح] ك هم بر شخص هم ده بر هیئت علیهنده وقوعی اساسنی
قبول ای دیلیور . بناء علیه اشخاص معنویه طرفندن دخی ذم و قدح دعواسی آجیله بیلور .
[هیئت] تعیینندن واضع قانونك مقصدی ، مجلس و دائره کی بردن زیاده عضودن مرکب
اولان « اشخاص معنویه » در . بونی ، قانونك ۲۸ نجی ماده سنده مندرج اولان « خاندان

سلطنت و مجلس اعیان و مبعوثان و محاکم و سایر دوائر و هیئات رسمیه و اردو و دونانمای عثمانی . . . الخ « فقره مسندن استدلال ایدیورز . قانونک استهداف ایتدیکی غایه ، رسمی اشخاص معنویه در . بناءً علیه ماده دوائر ، محاکم و اعیان و مبعوثان مجالسندن غیرى اشخاص معنویه علیهنه وقوع بوله جق ذم و قدح اوزرینه ، او غیر رسمی معنوی اشخاص نامه اقامه اولنه جق دعوالرک مسموع اولماسی لازم کلیر .

ذم و قدح فصلنده معین اولان جزالر، متجاوز علیهرک موقع اجتماعیرینه کوره متفاوتدره بو ایضاحات مجمله یی ویرمکدن مقصدمز ، آتیده سرد اولنه جق مطاماتک حسن تفهمنی تأمیندن عبارت اولدیغندن مطبوعات قانونک ذم و قدحه متدائر احکامنی دهاز یاده تثبیت ایچون ماده لری خلاصه ایتک لازمدر . یکر می آلتنجی ماده ، ذات حضرت پادشاهی حقنده قدح و یا ذمی متضمن مقالات و الفاظ و تعیرات نشر اولندیغی تقدیرده ، مسئولک اوج آیدن اوج سنه یه قدر حبس جزاسنه محکوم ایدیله جکنی ، یکر می یدنجی ماده ، ذم و قدح جرمی دول متحابه حکمدار لری و یا خود رئیس حکومت لری حقنده ارتکاب ایدلدیکی حالده جزانک بر آیدن بر سنه یه قدر اوله جفنی ، بالاده ذکر ایتدی کمز ۲۸ نجی ماده ایسه ذمی ارتکاب ایدنلرک اون بش کوندن آلتی آیه قدر حبس و یا بش لیرادن اللی لیرایه قدر جزای نقدی یه ، و ، قدح وقوعنده بر هفته دن اوج آیه قدر حبس ایله برابر بر آلتوندن یکر می بش آلتونه قدر جزای نقدی یه و یا خود بو جزالردن برینه محکوم اوله جقلرینی ، ۲۹ نجی ماده ، افراد اهالی حقنده ذم و وقوعنده بر هفته دن اوج آیه قدر حبس ایله ایکی لیرادن یکر می بش لیرایه قدر جزای نقدی و قدح جرمی ارتکابی حالنده بر هفته دن ایکی آیه قدر حبس ایله بر آلتوندن اون بش آلتونه قدر جزای نقدی و یا خود هر ایکی حالده جزادن یالکزر بری حکم اولنه جفنی تصریح ایدیور . شو حالده واضع قانون درجات متفاوتده جزا تعیین و حبس ایله جزای نقدینک هر ایکسینی حکم ایتکده حکامه اولدقجه واسع بر صلاحیت بخش ایتش اولیور . فقط عجبا بو تدبیر سینه سنده پک محترم و غیر قابل مؤاخذه اولان حکامک تقدیر و اجتهادی نظریات جزائیه یه موافق بر صورتده توثیق ایدیله بیلیور می؟ بو خصوصده مترددز . جرمک ثبوتی ایچون مطلقا بر چوق عناصرک وجودی شرطدر . حالبوکه جرائم مطبوعاتده بو عناصری کشف و جرمک موجودیتنه حکم ایدیه بیلیمک ایچون مطلقا نشریات عالمنده اختصاص پیدا ایتش اولیق لازمدر . معلومدر که حکامزک بلکه قسم اعظمی مطبوعات ساحه سنده متخصص دکلدلر و اونلرده بویله

بر وصف منضم آرامق جائز اوله ماز. اوحالده مطبوعات جرائمك اثنای محاکمه سنده حکامك قناعت وجدانیه سنی تشکیل ایدن عوامل متساوی دکدر. غیر متساوی عناصر ایله تحصیل ایدن تقدیرکده نظریات جزائییه نقطه سندن نه درجه به قدر سالم اوله جفی حقنده حکم ویر. مکی حقوق شناسانمزه حواله ایدرز.

فکر عاجزانه مزه کوره - اولجه ده عرض ایتشدک - مطبوعات محاکماتده جرمك وجود ویا عدم وجودینی اثبات ایده جک عناصری آرامق کلفتی حکامه دکل اهل وقوفه تحمیل ایتک، و جرمك وجودی بونلر طرفندن تصدیق ایدلد کن صوکره، اسباب مخففه ویا مشدده بی و تعیین جزا جهتترینی حکامه بر اقمق روح قانونه دها ملایم و عدالته وصول ایچون انتخاب اولنه جق الک سالم بر مسلکدر. امیز که بونک خلافت اوله رق سرد مطالعه ایده جک اولانلرک دلائلی چوق ضعیفدر. هله مطبوعات مسلکینده اختصاص پیدا ایتش اولانلرک جرائم مطبوعاتده عناصر جرمیه نك موجود اولوب اولمديغنی تقدیر خصوصنده هر کسدن زیاده صلاحیتدار اولدقلرینی تصدیق ایتهمک، بداهتی انکار دیمکدر. کرک جزا و کرک حقوق محکمه لرنده بر ماهیت خصوصیه بی حائز اولان کافه مسائل ایچون اهل وقوف وارباب اختصاص. صه مراجعت و آله جق رأي و قرارلرینه توفیقاً حکم ویرمک مقتضیات قانونیه دن ایکن، جرائم مطبوعات ایچون بو اصوله تبعیت ایتهمک اس عدالته موافقمیدر؟

خاتمه مقال اوله رق نظر دفته آلمسی لازم کن پک مهم بر مسئله بی ده موضوع بحث ایدلم: معلومدر که بعض مواد [اکثریسی دیگر ایکی مقاله مزده کوسترمشدک] ۳۲۸ و ۳۲۹ ده تعدیل ایدلمش اولان مطبوعات قانوننک تاریخی فی ۱۶ تموز سنه ۳۲۵ در. بو قانون ایله ۲۸۱ تاریخی مطبوعات نظامنامه سنک احکامی فسخ ایدلمشدر. قانون جزانک مطبوعات قانوننک تاریخندن مؤخر اوله رق تعدیل ایدیلن ۲۱۴ نجی ماده سی احکامی صوک درجه اهمیتی حائز بعض نقاطی محتویدر.

اول امرده شوراسنی عرض ایدلم که مذکور ماده ده مندرج (ذم) و (قدح) ک تعریفی ایله مطبوعات قانوننک ۲۵ نجی ماده سنده کی تعریف آرمسند پک بیوک فرقلر واردر: یوقاروده سویلدیکمز اوزره مطبوعات قانونی، ذم و قدح بحثنده [شخص معنوی] اساسی وضع ایتش ایکن، بوندن مؤخر اولان ۲۱۴ نجی معدل ماده قانونیه: «هر کیم دیگر کیمسه علیهنده» فقره سیله ذم و قدحک آنجق شخصه قارشو اوله بیله جکفی تصریح و «هیئت» تعبییره

مطبوعات قانوننده استهداف اولان (شخص معنوی) اساسنی رد ایتش اولیور. شو حالده مؤخر اولان ۲۱۴نجی ماده نك حکمنه کوره ذم و قدح دعواسی، بر هیئت ویا مجاس ویا خود محکمه نك شخصیت معنویه سی نامنه دکل، آنجق مرکب اولدینی اعضا نك منفرداً مراجعت و طلبلری اوزرینه ومدعی شخص صفتی اکتساب ایتك صورتیه اقامه ایدیله بیلیر.

بالطبع بو نقطه مهمنه حقنده کی معروضاتمز علیهنده سرد ایدیله جك مطالعاته اك مقنع جواب اولق اوزره ۲۱۴نجی ماده نك آتیده کی صوك فقره سی ذکر ایدرز:

« فی ۱۶ تموز سنه ۳۲۵ تاریخلی مطبوعات قانوننك بو مواده مخالف اولان

احکامی مفسوخدر. »

مؤخر اولان بوماده نك صراحتی میدانده ایکن، بشقه درلو حرکت و مطالعه بیان ایتك جائز اوله ماز. بو خصوصده تعقیب ایدیله جك بر یول واردر: مطبوعات قانوننك تاریخ نشری اولان ۳۲۵ سنه سندن برو تعدیل ایدلیوبده ۲۱۴نجی ماده معدله قانونیه احکامیه مخالف بولنان ماده لری مفسوخ عد ایتك، و، ۲۱۴نجی ماده ماده معدله نك تاریخ نشریدن یعنی ۳۲۸ سنه سی شباطندن صوکره تعدیلی ایدلش اولان مطبوعات قانوننك ماده لرینك مرعیتنه قائل اولق ضروریدر.

بو سلسله محاکمات نتیجه سنده جزا قانوننك ۲۱۴نجی ماده معدله سنك صوك فقره سی حکمنجه مطبوعات قانوننك ۲۵، ۲۶، ۲۷، ۲۸، ۲۹، ۳۰نجی ماده لری منفسخ و مذکور ماده قانونیه مخالف اولیان دیگر موادی مرعیدر.

مطبوعات قانوننك جزایه متدائر اولان موادی بو صورتله مفسوخ و ۲۱۴نجی ماده ایله عمل ایدلک وجوب تحتنده اولنجه، بو قانوننك مواد سائر سننده انسجام و وحدت قالمامشدر. بناءً علیه موضوعات اساسیه مزه کوره مطبوعات قانوننك علمی بر طرز نوین دأره سنده تنظیمی کیفیتی، منفعت ملت و مملکت نامنه بر لازمه حالی آلمشدر فکرندیز.

کربری احمد مانی